

UCAPAN PERDANA MENTERI DI UPACARA PELANCARAN KEWANGAN USAHA BERSATU BERHAD, DI PUSAT SIVIK PETALING JAYA, PADA 13 MEI, 1979.

Saya bersyukur kehadiran Allah Subhanahu Wataala kerana dengan limpah kurniaNya serta izinNya kita dapat hadir di upacara pelancaran Kewangan Usaha Bersatu Berhad pada pagi ini. Majlis pelancaran ini membawa erti yang besar kerana institusi yang ditubuhkan pada hari ini adalah anak syarikat yang sulung Koperasi Usaha Sama Bersatu Malaysia Berhad atau Koop Bersatu. Kewangan Usaha Bersatu Berhad ini dilancarkan pada hari ini bagi mengambil sempena ulangtahun UMNO yang ke 33. Ia merupakan projek Koop Bersatu yang besar dan penting selepas tertubuhnya koperasi itu dua tahun yang lalu sempena ulangtahun UMNO yang ke 31.

Saya ingin mengambil peluang ini untuk mengucapkan tahniah kepada Senator Kamarul Ariffin, serta badan pengurusan dan pentadbiran Koop Bersatu di atas kejayaan mereka menubuh sebuah anak syarikat yang dimiliki penuh oleh Koop Bersatu dalam masa dua tahun selepas sahaja koperasi ini dilancarkan. Kejayaan Koop Bersatu menubuhkan institusi kewangan ini dalam masa yang begitu singkat merupakan satu langkah yang berani. Ia juga mencerminkan kesanggupan kita untuk mencebur diri dan mengambil bahagian dalam kegiatan kewangan. Saya juga mengambil kesempatan ini untuk mengucapkan berbilang terima kasih serta setinggi penghargaan kepada Senator Kamarul Ariffin dan pegawai-pegawainya kerana telah memberi penghormatan kepada saya untuk melancarkan Kewangan Usaha Bersatu Berhad ini.

Salah satu sebab Koop Bersatu ditubuhkan ialah untuk membaiki taraf ekonomi dan sosial orang-orang Melayu. Ini adalah selaras dengan hasrat kerajaan bagi melipat-gandakan usaha dan tenaga orang-orang Melayu dan kaum bumiputera yang lain untuk meningkatkan lagi kegiatan mereka dalam bidang pembangunan ekonomi. Koop Bersatu ini merupakan salah satu langkah yang berkesan bagi membantu kerajaan dalam usahanya mencapai matlamat Dasar Ekonomi Baru.

Kita hanya mempunyai 11 tahun lagi untuk menunaikan matlamat Dasar Ekonomi Baru, iaitu mencapai penyertaan pada kadar sekurang-kurangnya 30 peratus dalam bidang pemilikan modal. Mengikut Kajian Separuh Penggal bagi Rancangan Malaysia Ketiga, sekarang ini kita telah berjaya mengumpul 10.2 peratus daripada jumlah modal yang ter-

kumpul dalam bidang perdagangan dan perusahaan. Daripada jumlah ini, 6.7 peratus dipegang oleh badan-badan "trustee" seperti MARA, UDA, PERNAS dan lain-lain yang memegangnya bagi pihak kaum bumiputera. Dari segi orang perseorangan dan syarikat-syarikat Melayu, jumlah "equity" yang dimilikinya ialah 3.6 peratus. Adalah menjadi tujuan kerajaan untuk membanyakkan lagi orang-orang Melayu dan syarikat-syarikat Melayu memiliki modal. Kerajaan juga sangat-sangat mementingkan bahawa lebih ramai lagi orang-orang Melayu mendapat faedah daripada pemilikan modal yang meningkat ini. Dengan tertubuhnya institusi-institusi seperti Kewangan Usaha Bersatu Berhad ini, maka hasrat kerajaan ini akan lebih mudah lagi dicapai.

Semenjak ia ditubuhkan, Koop Bersatu telah menjalankan berbagai usaha untuk mendaftar seramai-ramai ahli yang boleh. Saya rasa amatlah wajar bagi kita sekarang menumpukan perhatian kita kepada sambutan orang ramai terhadap Koop Bersatu. Bilangan ahli perseorangan Koop Bersatu sehingga 14 April, 1979 ialah 9,160 orang. Jika dibandingkan dengan bilangan ahli-ahli UMNO yang seramai lebihkurang 630 ribu orang itu, maka nyatalah bahawa bilangan ahli-ahli Koop Bersatu tidak begitu memuaskan. Jika kita menganggap bahawa kesemua mereka yang telah mendaftar diri menjadi ahli adalah terdiri daripada ahli-ahli UMNO, maka cuma 1.43 peratus sahaja daripada ahli-ahli UMNO keseluruhannya menjadi ahli Koop Bersatu.

Oleh hal yang demikian, kita mestilah mencari jalan yang lebih berkesan lagi untuk memastikan bahawa kadar pengambilan ahli yang lebih pesat dapat dilaksanakan. Saya berharap ahli-ahli UMNO dapat kembali kepada semangat perjuangan kita sewaktu menuntut kemerdekaan dan menggunakannya untuk ditumpukan kepada bidang kegiatan ekonomi. Sebagaimana yang telah UMNO lakukan ketika berjuang mendapat kemerdekaan dulu, kita juga seharusnya mengarahkan segala daya yang ada pada kita untuk memelopori orang-orang Melayu supaya bersatu dan mencebur diri dalam lapangan ekonomi dengan cara besar-besaran. Di sinilah terletaknya peranan Koop Bersatu yang boleh menjadi tumpuan kepada orang-orang Melayu. Dengan menceburkan diri mereka dalam kegiatan koperasi ini, orang-orang Melayu akan mendapat satu lagi peluang untuk lebih giat di bidang pelaburan.

Dari segi pembelian saham pula, permohonan telah diterima untuk membeli saham yang bernilai sebanyak \$1,980,423 sehingga 14 April, 1979. Jumlah bayaran saham yang telah dijelaskan sehingga tarikh yang sama ialah sebanyak \$871,181. Seperti yang telah saya nyatakan sebentar tadi memanglah UMNO mempunyai ahli yang ramai. Jika tiap-

tiap seorang ahli membeli 100 saham, iaitu had yang paling rendah, maka dalam masa yang singkat sahaja jumlah modal Koop Bersatu akan meningkat menjadi lebih daripada \$63 juta. Jika kita berjaya mengumpul modal sebanyak ini maka jalan akan terbuka luas bagi kita mengambil bahagian, melalui Koop Bersatu dalam berbagai bidang perusahaan dan ekonomi seperti perumahan dan perlombongan. Kegiatan ini bolehlah kita laksanakan dengan menggunakan kawasan-kawasan tanah simpanan Melayu yang masih tidak diusahakan sekarang

Saya sedar mungkin ada orang-orang kita, terutamanya di kampung-kampung, yang tidak mampu membayarnya sekaligus. Oleh sebab itulah Koop Bersatu telah mengadakan Undang-Undang Kecilnya untuk membolehkan ahli-ahlinya membayar pembelian saham dengan cara beransur-ansur. Dengan adanya peruntukan ini, adalah diharapkan lebih ramai lagi orang-orang kita menjadi ahli.

Pada masa Koop Bersatu dilancar dalam tahun 1977, saya telah menegaskan bahawa koperasi kita ini mestilah mempunyai ramai ahli untuk memaju dan menjayakannya. Di sini saya ingin menyeru sekali lagi kepada semua ahli-ahli UMNO khasnya dan orang-orang Melayu lainnya supaya menjadi ahli Koop Bersatu. Masa depannya adalah bergantung kepada orang-orang Melayu. Terpulanglah kepada kita sendiri untuk menentukan samada Koop Bersatu ini berjaya atau tidak. Oleh hal yang demikian, kita semua seharusnya menyertai koperasi ini.

Dalam usaha pembangunan ekonomi moden, pelaburan memainkan peranan yang penting. Kita mestilah lebih bergiat untuk menanam modal jika kita mahu meningkatkan lagi pemilikan harta dalam sistem ekonomi moden. Sejarah telah pun membuktikan bahawa sesebuah masyarakat yang sanggup bergiat dalam bidang pelaburan untuk menjamin masa depannya. Ini bererti masyarakat itu mestilah sanggup mengurangkan kadar penggunaan (consumption) untuk membolehkan sebahagian daripada wang yang ada padanya disalurkan bagi maksud pelaburan. Kebanyakan negara-negara menjadi maju kerana mereka sedia dan sanggup berbuat demikian.

Sesuatu masyarakat yang lebih mementingkan penggunaan daripada pelaburan akan mendapati bahawa perkembangan dan pencapaian ekonominya akan jadi merosot. Jika orang-orang Melayu hendak mencapai tingkatan yang maju dalam bidang ekonomi, mereka mestilah bersedia untuk menyimpan sebahagian daripada pendapatan mereka bagi maksud pelaburan. Perkara ini bukanlah satu perkara yang mudah dicapai, kerana ia melibatkan sikap kita. Oleh itu, orang-orang Melayu hendaklah menukarkan sikap terhadap penggunaan dan mestilah ber-

ansur-ansur menceburkan diri dalam lapangan pelaburan. Di sinilah UMNO dan Koop Bersatu dapat memainkan peranan masing-masing untuk membantu kita semua menukar sikap ini. Saya yakin dengan susunan UMNO yang mempunyai Bahagian dan Cawangan di merata-rata tempat, maka kita akan dapat memainkan peranan sebagai tenaga penggerak dalam usaha hendak menukar sikap orang-orang Melayu ini. Masanya sudah tiba bagi semua orang-orang Melayu berdiri di atas kaki sendiri dan menjalankan kegiatan-kegiatan ekonomi tanpa terlalu bergantung kepada kerajaan. Bantuan kerajaan hendaklah dianggap sebagai satu pertolongan yang boleh melicinkan dan meringankan usaha kaum bumiputera mencebur diri dalam lapangan ekonomi moden.

Penubuhan Kewangan Usaha Bersatu Berhad merupakan satu usaha perintis. Langkah ini akan dapat meyakinkan ahli-ahli UMNO khasnya dan orang-orang Melayu amnya bahawa Koop Bersatu boleh menjalankan tindakan konkrit bagi mencapai matlamat koperasi ini. Kejayaan kita melancarkan Institusi kewangan ini akan memberi lebih perangsang kepada Koop Bersatu untuk mengorak langkah membanyakkan lagi usaha dan kegiatannya. Oleh itu marilah kita bersama-sama memberi sokongan yang penuh kepada Koop Bersatu. Dengan seruan ini, saya dengan segala sukacitanya merasmikan pelancaran penubuhan Kewangan Usaha Bersatu Berhad dan berdoa moga-moga ia mengalami kejayaan yang gemilang.

Terima kasih.